

Uztaritzeko Landagoien Etxean, 1984.eko ekainaren 23an egin du Euskaltzaindiak hileroko bere batzarre arrunta. Bildu dira: L. Villasante, J. Haritschelhar, P. Altuna, J. Hiriart-Urruty, A. Irigoien, E. Knörr, P. Lafitte, E. Larre, F. Ondarra, P. Salaburu, J. San Martin eta J. M. Satrustegi, euskaltzainak. J. M. Etxebarria, J. L. Lizundia, B. Oihartzabal, K. Rotaetxe, X. Videgain, eta J. J. Zearreta, euskaltzain urgazleak, J. M. Satrustegi idazkari dela.

J. L. Davant, X. Diharce, F. Krutwig eta P. Larzabal jaunek ezin etorria adierazi dute.

Ohi den otoitzarekin hasi da batzarrea.

IV. Dialektologi Jardunaldiak

Atzo, ekainak 22, eta gaur goizean, Atlas Linguistikoa delakoaren galdekizunen proposamena finkatzeko, IV. Jardunaldiak burutu dira Landagoienen. Txosten hauek eman dira:

J. M. Etxebarriak sarrera orokorra egin du lehenik, emandako urratsen eta presaturiko lanen aipamenarekin.

G. Aurrekoetxea. Goizeko hamaikak aldera, fonetika eta fonologia alorretan agertarazi behar diren fenomenoen erabakigaia aurkeztu du Gotzon Aurrekoetxeak. Ez ziren helburuak ongi ikusten eta eztabaida luzea sortu da. Jasotako oharrekin aholkulariei beste eredu bat bidaliko zaie oharrak egin ditzaten. Eguerdian amaitu da lehen saioa.

Arratsaldeko ordu bi t'erdietan Morfologiaz ekarri duen txostena irakurri du J. M. Etxebarriak. Berrelaborazio baten beharrean gelditu da erabakigaia.

Ekainak 23, larunbata.

Xarles Bidegain. Lexikoaz aritu da goizeko 9etatik aurrera X. Bidegain eta luzaz eztabaidatu da gaia, arratsalderako utziz amaiera. Ordu bi t'erdietan eman zaio jarraipena. Bertan zirenek eta aholkulariek jasoko dituzte txostenak eta datorren hilaren 20-rako egin bitzate, idatziz, oharrak.

G. Rebuschi ez da etorri eta joskerari buruz egin duen txostena B. Oihartzabalek irakurri du. Zernahi bada ikerketa honetan. Mardula eta baliosa. Proposamena onartu da.

Atlasgintzaren arazo tekniko, ekonomiko eta azpiegiturazkoek bete dute gero hainbat denbora. A) *Arazo teknikoak*. Mapak, esate baterako, garrantzi handia dute honelako lanetan. Hizkuntzarekikoak dira zuzenean lanari dagozkionak. Eredua, neurria eta beste puntu batzu aipatu dira. Mapa lagungarriak ere badaude, bestealde, hala nola herrialdeena, elizbarrutiena, merkatu eta bazkena, besteak beste. Aipamen soilean gelditu da gaurkoa, bere egunean aukera egiteko. B) *Diru arazoak*. Datozen lau urteko ekintzen aintzin-asmoak Erakunde ofizialei aurkeztea eskatzen zaigunez, zehaztasun batzu eta, ahal den neurrian, epea ere mugatzea komeni da. Hori dela eta, langile bakoitzaren egoera eta dedikazioa ikusi da. Bulego-langile baten beharra legoke oraindik, eta hiruen bat laguntzaile hartu beharko omen dira geroxeago. Galdekizunen zerrenda osotzea da orain lehen helburua. C) *Azpiegitura*. Horrelako lanak egin izan dira bazterretan eta haien esperientziak baliatzeko harremanetan sartzea komenigarri ikusten da. Barcelona, Tolosa Frantziakoa, Estrasburgo eta beste zenbait hiriburutara itzuliren bat egin beharko da. Eskuarlean ditugun magnetofoi eta tresnen ardura aipatu da. Atlasean sartzerik izango ez duten hainbat eta hainbat gauza argitaratzeko barne-aldizkari bat sortzea eskatu dute batzorde arduradunek.

Azken orduko berriak

Kanbon, Ekainaren 22an, *Jean Etchepare Mirikuaren (1877-1935) idazlanak*, izeneko liburua aurkeztu zen. Beste agintari batzuren artean, Eusko Jaurlaritzako Kultur-kontseilari ordeak egin zuen aurkezpena. Labegerie, Kanboko andere auzapezak eman zien batzartuei ongiatorria. M. Itzaina, Euskaltzaleen Biltzarreko lehendakaria mintzatu zen gero. P. Lafitteren hitzaurrea irakurri zuen J. Haritschelhar euskaltzain buruordeak. Azkenik, P. Charriton, liburuaren egileak, bildumaren zenbait berezitasun jakingarri azpimarratu zuen bere hitzaldian.

Uztailaren lehenean Maulen egitekoa den bertsolarien egunerako gomita jaso dela aditzera eman da. Bertan izango diren euskaltzain osoek izango dute Euskaltzaindiaren lekukotasuna.

Diruzainak esan duenez, Hiztegi Orokorren ekintzetarako lehen diru emaitza jaso du Euskaltzaindiak babesleengandik eta *Campion-Broussain S. A.* azpi elkar-goarekin kontratua izenpetu bitartean, gastuentzat diru aurreratze bat egin zaie arduradunei.

Datorren Uztailleko Euskaltzaindiaren Batzarrea Bilboko egoitza berrian egin nahi litzatekeela aditzera eman du idazkari-ordeak. Nazario Oleaga zenaren jaiotz -ehunurteburua ospatuz omenaldia eskainiko zaio bertan.

Batzordeen berri

Gramatika batzordearen izenean J. Haritschelhar mintzatu da. Bukatuxea dute-la Iruñeko Biltzarreko txosten nagusia, esan du. Azken orraztapena ematekoa den batzordeñoa ere izendatua da, eta mekanikaz idazteko lana laster hasiko dute.

Mailegu Hitzen erabakigaiak

Bigarren aldiz atera da mailegu hitzetako x erabilpenaren arazoa. Gaurkoan, A. Irigoyen, F. Krutwig, P. Salaburu eta L. Villasantek ekarri dituzte beren oharrak.

Mailegu berrietan letra hori aldatu gabe, dagoen-dagoenean hartzearen alde agertu dira batzu; eta mailegu zaharretan egin ohi izan den joeraren alde besteak. Aurkeztutako oharrak jaso eta irakurtzeko eperik ez zegoenez, beste aldi batean erabakitzeko utzi da.

Eta besterik gabe amaitu da batzarrea.

Euskaltzainburua
Fr. Luis Villasante

Idazkaria
Jose M.^a Satrustegi